



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**De Breviario Concionatorio, Strenæ, Fidelis Prophetissa  
Concionibus de B. M. Virgine serviens, Conciones  
Occurrentes & Funebres**

**Tylkowski, Wojciech**

**Oliva, 1686**

Spiritualis Circumcisio.

[urn:nbn:de:hbz:466:1-51821](#)



# PARS PRIMA.

Strenæ in Communi.

## S T R E N A I.

Spiritualis Circumcisio.

**N**on ero contrarius Apostolo intonanti Galatis 5. cap. Si circumcidamini Christus vobis nihil proderit, Si dixerim. Nisi circumcidamini Christus vobis nihil proderit. Ille enim de Judaica, ego de Christiana: Ille de carnali, ego de spirituali affirmo circumcisione, sit enim suæ etiam animæ & spiritui circumcisione, & sicut nihil profuisset nobis Christum natum, passum, mortuum fuisse, nisi & nos cum illo renascamur, patiamur, & moriamur, sepeliamur, & resurgamus; mortui peccato in vita noxitate ambulantes: ita nihil nobis contulerit ejus circumcisione quam nostri causâ hodie suscepimus, nisi & nos fuerimus circumcisi, nisi ut passionem, ita & circumcisionem in nobis circumferamus, non carnalem vero sed spiritualem, quæ est in veteris hominis expoliatione, malarum concupiscentiarum refectione, mentisque totius renovatione, quod usque adeò necessarium est, ut nisi quisque ita fuerit circumcisus, ad plenam & perfectam, quæ erit in altera vita ab omni carnis corruptione & mortalitate, pervenire non posse: ita enim Ezech. 44. *Omnis alienigena incircumcisus corde non ingredietur in sanctuarium meum.* Sed prohdolor, nec enim frustra lamentatur Jer. 9. *Omnis domus*

A

domus

2  
domus Israël incircumcisæ sunt corde. Et cap. 6. Ecce incircumcisæ aures eorum, & audire non possunt. Multi, quorum D. Stephani Act. 7. servit increpatio. Durâ cervice, & incircumcisæ cordibus, & auribus, vos semper Spiritus S. resistitis. Sanè eò jam Christianam rem videmus rediisse ut si mores affectusque spe-  
ctes, vix à Paganis & Gentilibus distingvi valeant, imò Ethni-  
corum multi castiùs, magis sobriè, justè vivant. Dabo itaque  
vobis pro Strena artificium Spiritus circumcidendi, sed priùs  
de illius necessitate. Dixi Gentiles castiùs, justiùs, & magis  
sobriè vivere ne videar asperè locutus, uno saltu exemplo id  
ipsum illustro. Refert Plutarchus Themistoclem Athenien-  
sibus pro Concione dixisse, se consilium reperisse quodd sum-  
mopere ad dignitatem utilitatemque Atheniensium pertine-  
ret, sed id esse ejusmodi ut in publicum proferri non expediret.  
Populus ergo censuit ut uni Aristidi rem indicaret, si id probaret  
ille, probaturos omnes. Aperuit Themistocles Aristidi, se de  
incendenda Hostium navalí statione cogitare: sic enim fore  
ut Athenienses totius Græciæ dominio potirentur. Aristides  
ad populum prodiens dixit. Re, quam machinatur Themis-  
tocles, neque compendiosiorem esse, neque iniquiorem. Hoc  
est, consilio Themistoclis neq; utilius quidquam, nec eodem  
iniquius. Audito iniquitatis nomine Populus, vetuit ne super  
ea re verbum faceret Themistocles. Quis hunc amorem justi-  
tiae inter Christianos facile reperiat? quis ita horret nomen in-  
justitiae, quotus adeò reperitur amans innocentia, ut obla-  
tam sibi insignem utilitatem cum injustitia, rejiciat? Virtus  
post nummos, Christiani, agitur de prædiolo acquirendo, nulli  
fraudi parcitur, agitur de lucro misero nullum vitatur perju-  
rium. Quot crimina quotidie Mercatores, quot Opifices, Ju-  
dices, Causarum Advocati committunt? quot, usuris, rapinis,  
cruore pauperum sua lucra augent? Ad summam utilitatem

Athe-

Atheniensium pertinebat quod Themistocles intendebat, Atheniensium, quibus non fides Christi, non lex Divina, non supplicia æterna fuerant nota, quia verò cum injustitia coniunctum fuit, ne quidem sunt passi verbum de illo fieri. Ideoq; justissima est contra nos Dei ira, & nisi hæc vitia in nobis excindere curaverimus gravissimum imminet judicium. Nemo se fallat, ut quia Christianus, quia baptisatus, quia Sacramenta frequentat, si est injustus & Gentilibus deterior, salvandum se putet. Exemplo sic nobis populus Israëliticus. Fuit ille magis DEI clementia de toto mundo selectus, ut esset singuliter illius & peculium Domini conferetur. *Omnes mare rubrum transferunt, omnes in nube baptisati sunt, omnes eandem escam spiritualem manducaverunt, & potum spiritualem biberunt.* Omnes circumcisiois Sacramentum suscepserunt, nihil eis hæc omnia profuerunt ut dicit Apost. 1. Cor. 10. sed prostrata sunt in deserto corpora eorum, perierunt ab Exterminatore, exclusi sunt à terra promissionis. *Hac autem in figura nostri contigerunt.* Hæc scripta ad nostram corruptionem. Nemo igitur Ecclesiæ Sacramentorum societatem, & participationem sibi profuturam existimet, nisi vita novitati, & morum correctioni det operam. Nemo quia natus, circumcisus, & passus est Christus sperare salutem deberet, nisi ei similis esse studuerit, nisi intus renascatur, & circumcidatur, & Christo commoriatur. Alioqui idem illi eventurum quod Israëlitis circumcisiois ut in saeculi deserto pereat, nec ad illam secundam & beatam circumcisionem perveniat, sed ut ait Propheta Ezech. 28. *Morte incircumisorum moriatur.* Omnes vici illius, quæ Christus est, palmites: omnes membra corporis esse volumus, sed quomodo id fieri potest? cum palmites qui in vite sunt, Pater coelestis Agricola purget, Joann. 15. ut fructum ampliorem afferant. Nos autem & foliis & pampinis abundamus, purgantis

A 2

&amp; re-

4

& resecantis DEI Patris manum molestissimè ferimus, imò aversamur, nec eam sustinemus. Purgare nos illa vult ab amore divitiarum, & bonorum præsentium inordinato & perverso affectu, eò bella tendunt, vastitates agrorum, direptiones, militares executiones. Præscindere à nobis noxias carnis voluptates laborat, quando pauperiem & morbos immittit, à nimio nostri nos amore conatur revocare, per varias humiliações, & dejectiones, & ecce nihil aliud quām DEO obmurmuramus, & per impatientiam reluctamur, adeò fructum plurimum non afferimus, ut prouis tantum labruscas profaramus Iai. 5. An non ergò impendet nobis, quod apud Joann. Christus cap. 5. ait. *Omnem palmitem in me non ferentem fructum, tollet eum Pater meus, &c.* Id sanè restat, & timere debemus, ne quando à noxiis & superfluis farmentis purgari & præscindi nolumus, nec fructum adferre studemus, toti simul absinda mur, nō in futuro tantum, sed hic quoq; ab ipsa vitiis Christi societate & incidere permittamur in hærefes, imò Atheismos. Dum enim puram, circumcisam, & bonam habere conscientiam negligimus, & eam à nobis repellimus, fit, hoc præsertim sèculo, ut fidei naufragium patiamur. 1. Tim. 1. Certè ut parcat hic nobis longanimitas DEI, manet nos sanè atrocissima & horrenda in futuro sèculo resectio & circumcisio, vel potius amputatio, quando à bonorum omnium cœtu, à bonis omnibus, atque à DEO ipso bonorum omnium authore & fonte, per divinam sententiam penitus absindemur. O quo igne ibi ardebunt recisi palmites isti! ô quantum & quām grave non ex sceno tantum & stipula, sed ex vasta lignorum & farmentorum strue orietur incendium! ô quanta tunc uret flamma, cui tanta nunc corruptio nis nostræ, quam nunc circumcidere & sanare nolumus nutrimenta præparamus! ô quām torquebunt, & in quantitate tormenta vertentur noxiæ istæ & luxuriantes cupiditates! quas hic, nihil

nihil eis denegantes foveamus, & in immensum augemus. Sic ostensâ circumcisionis hujus necessitate, audite ejus artificium, & in quo ipsa consistat.

Circumcidamus affectus nostros & corda nostra, & Divinitatis timoris gladio malarum cogitationum, & cupiditatum omnium intemperantiam abscondamus. Non ambulemus post concupiscentias nostras, nec in viis cordium nostrorum nec in intuitu oculorum nostrorum. Eccl. 18. Non faciamus quæcumque placent, non cogitemus quæcumque volumus, non loquamur quidquid in os venit, sed ut artificium clarius fiat, in quædam præcepta est distingvendum. Circa tria ergo potissimum hæc ars versatur, circa membra nostra seu corpus, affectus, & bona externa.

Quod attinet membra corporis nostri, & sensus exteriores. Adeò natura humana peccati morbo infecta est, ut vix quidquam in ea sit quod spirituali circumcisione non egeat, quânoxia subtrahantur, & salutaria relinquantur. Docebat hoc D. Bern. serm. i. de Circumcis. ita loquens. Et nos Fratres circumcidiri nescire est, non literâ, sed spiritu & veritate, circumcidiri non uno membro, sed toto corpore simul. Licet enim magis in ea parte in qua mandata est Iudeis circumcision, regnet additamentum Leviathan, quod à malo est, & amputari debet. Universam tamen occupat carnem, à planta pedis usq; ad verticem capitis non est sanitas in nobis, non est aliqua pars quæ non sit hoc veneno tabida. Propterea sicut parvulus in fide, & dilectione populus congruum sibi mandatum exigue circumcisionis accepit, sic ubi crevit in virum perfectiore toto jubetur corpore baptisari, quætorius est hominis integræ circumcisionis. Hinc est quod Salvator noster & circumcidit octavo die, & post annum trigesimum dignatus est crucifigi, ubi in pœnam corpus omne distensum est, cuius similitudini mortuus complantamur & nos. &c. Sic ille.

Circumcidendi ergo primum sunt Oculi, quorura.

A 3

circumcisionem Propheta sic à DEO petebat Ps. 118. *Averte oculos meos ne videant vanitatem.* Sed hic iterum videamus Ethnicos, ne forte nos superaverint. Curt., in Alex. Refertur Alexander Magnus dixisse. *Dolores oculorum sunt Persicae puella, sed ego eas tanquam latuas inanimes prætereo:* nimis ab iis avertendo oculos. Scribitur de Scipione Africano, quod captam in Hispania nobilem, & pulcherrimam puellam conspicere vix voluerit, sed viro cui desponsata fuerat, intactam reddiderit. Oculos incircumcisos habent illi, quos D. Petrus. 2. Petr. 2. dicit, habere oculos plenos adulterii & incessabilis delicti. Cujuusmodi & fornicaria illa habebat, de qua Sapiens Prov. 7. De fenebris adiunctorum proficiens, videt parvulos, considerat vecordem Juvenem, &c. Sed modo plorandum cum Jeremia cap. 9. Ascendit mors per fenebras, id est, oculos, qui quasi fenestrae sunt domus. Et ingressa est domos nostras. Quid ex eo? idem quod ex furis ingressu. Thren. 5. *Oculus meus deprudatus est animam meam.*

Circumcidenda etiam Aures ne otiosis verbis, ne detractionibus, ne impudicis, ne adulatoriis, ne pravis consiliis, adiutum præbeant. Ad quod Salomon inducit, cùm ait Eccl. 28. *Sepera aures tuas spinis, & noli audire linguam nequam.* Ad detractiones quasi surdus efficiaris, sic audies extra culpam, ac si non audires quando aliter nec prohibere loquentem, nec evitare vales. Si non pudet in hoc Sanctos imitari, saltē pudeat non imitari Gentilem Ulyssem, qui malo alligatus, audivit Sirenum cantus quidem, sed his contemptis syrtes prætervectus evasit quietiam sociis contra vocum prospexit illecebras, dum aures eorum cera impactâ præcepit obturari.

Circumcidendus quoque gustus ut viatu simplici contentus exquisitos sapores, cupedias, atque varia genera deliciarum, tanquam carnalium hominum inventa, superbiz & elationis fomenta, libidinum irritamenta, detestetur. Haec enim præci-

præcipit Apostolus. Rom. 13. quando monet, ne carnis curam faciamus in desideriis. Coloss. 3. Ut sapiamus quæ sursum sunt, non quæ super terram. 4. Reg. 4. Non gustemus mortem quæ est in olla hujus carnis. Job. 6. Non gustemus quod gustatum affert mortem. Non sapiamus quæ sunt carnis sed quæ Spiritus Dei. Cogitemus, voluisse Christum bibere amarum passionis calicem vino myrrato cum felle mixto atque acero potatum. Recor demur absynthii ejus & fellis, nostrumque eibum ac potum amaritudine passionis ejus temperemus: Sobrii simus, & saporem in spirituali edulio collocemus. Sermo Dei, oratio, fraterna admonitio, Sacramentorum usus nostri delectent cordis palatum.

Circumcidenda sunt manus ne aliena rapiant, ne pauperibus eripiant, ne servos & mercenarios operis sui præmio spoli ent. Potius ad pauperes sunt extendenda, uti Mulier illa fortis, quam adeò commendat Sapiens in proverbii cap. ult. facere solita est. Manum suam aperuit inopi, & palmas suas extendit ad pauperem. Imitemur Patrem nostrum cœlestem, qui aperit manum suam & implet omne animal benedictione Ps. 144.

Præter haec circumcidenda est lingua, quæ Jacob. 3. maculat totum corpus nostrum, & inflamat rotam nativitatis nostræ inflammata à gehenna. Rota nativitatis nostræ est corpus istud cum quo nati sumus, quod ab ortu ad mortis usque occasum rotæ instar per continuum inconstantie & varietatum volubilitatem versatur, & hæc rota ignibus infernalibus accensa non cessat mil le modis maledicta congerere, mentiri, calumniari, lices move re, cædes struere, & quasi incendio suo quæcumque attigerit, in volvere: eo modo, quo, si rotam pice perlitam & incensam circumagas, quæ aedes, horrea, sylvas, & oppida integra flammis voracibus absuminat. Contra hanc de cælo petendum cum Prophetæ auxilium Ps. 140. Pone Domine custodiam ori meo, & obli um circumstantia labii mei.

Est

Est & alia interior affectuum nostrorum & desideriorum circumcisio: latet enim in corde nostro concupiscentia appetitus, qui carnalium affectuum & cupidinum est origo, à quibus omnia scelera prodeunt, ut ambitio, libido, avaritia, ira, invidia, contentiones, inimicitiae &c. Hæ namque pestes ex corde nostro oriuntur dicente Domino Matth. 15. De corde excent cogitationes mala, homicidia, adulteria, supra, falsa testimononia &c. Cùm ergo hæc omnia mala ex corde nostro veluti ex tèrri mo fonte scaturiant, necesse est, ut ad letalis hujus arboris radicem secutis apponatur, ut radice utrumque abscissâ, malorum quoque germina extirpentur. Hoc enim est quod Moyses olim populo præcepit Deut. 10. Circumcidite præputium cordis vestri & cervicem vestram ne induretis amplius. Quod quidem Divinae legis præceptum Apostolus explicuit & implevit 2. Cor. 4. cùm se occulta dedecoris abdicare testatus est. Hoc autem facit quisquis omnia peccati germina ex corde pullulantia gladio Divinitatis absindit. Hanc cordis circumcisionem postulabat Prophetæ Regius, Ps. 50. Cor mundum crea in me Deus, & spiritum rectum innova in visceribus meis. Quod ubi obtinuerat, exclamavit præ gaudio & dixit Ps. 83. Cor meum & caro mea exultaverunt in Deum vivum.

Tertiò etiam bona externa circumcidenda sunt, ut intra suam se quisque mensuram contineat, & ad ea quæ vires suas & facultatem superant, extendere se non audeat. Ita se Rex ille Sanctus continebat Ps. 130. Domine non est exaltatum cor meum neq. elati sunt oculi mei neq. ambulavi in magnis, neq. in mirabilibus super me. Sic etiam Apost. se continebat 1. Tim. 6. Habentes alimenta & quibus tegamur, his contentissimus. Hæ namque naturales sunt divitiae, hic usus vitæ, hæc virtus, hæc natura postulat, quibus olim contenti homines fuerant, cùm juxta præscriptum naturæ viverent. Cætera verò quæ postea in mundum invecta

investa sunt, partim hominum intemperantia, partim terrena prudentia excogitavit. Natura enim præcipue quærit quæ Sanctus ille Patriarcha optabat Gen. 28. Si Dominus dederit mihi pacem ad vescendum, & vestimentum quo operiar. Et Salomon Prov. 3. Divitias & paupertatem ne dederis mihi, sed tantum victui meo tribue necessaria. Quodsi hâc regulâ usum vitæ metiamur, bone Deus, quanta in domibus opulentorum inveniemus quæ oportebit ressecare! quot genera indumentorum quibus corpora non teguntur sed gravantur, quot peristromatum & aulæorum formæ quibus muri & lapides vestiuntur dum Christi pauperes frigore consumuntur! quot ciborum, cupediarum, deliciarum, atque odorameatorum species! quam multis esurientibus reficiendis, quot nudis vestiendis illa sufficerent, quæ tu cum summa pauperum injuria inaniter & turpiter profundis! Notum est illud S. Ambrosii. Pascé fame morientem, si non pavisti, occidisti. Contra tales ita fulminat S. Basil. hom. 6. in dilectentes avaros. Esurientis est panis quem tu retines, nudi est vestis quam in arcu custodis, discalceati calceus qui apud te marcescit, egentis argentum quod tu infassum terra possides. Quare, tot injurias hominibus quot poteras opem conferre. Quocirca hanc moralem circumcisionem benè servant, qui voluntariam Paupertatem amplectuntur, & relictis omnibus, nudi nudum Christum sequuntur. Optimè, ait Bern. serm. i. de Circumcis. Circumcidit nos, & superflua rescat universa, voluntaria paupertas, penitentia labor, regularis observatio discipline. Hanc amplexus est Christus D. qui dicit Ps. 39. Ego sum mendicus & pauper, & in laboribus à juventute mea. Et Luc. 9. Vulpes foveas habent, & volucres cali nidos ubi ponant pullos suos: Filius autem Hominis non habet ubi caput reclinet. Hanc elegit Apostolorum Princeps Act. 3. Aurum & argentum non est mihi. Hanc Doctor Gentium i. Cor. 4. Usq. in hanc horam & esurimus & sitimus & nudi sumus. Hoc præ-

B

præ-

præscriptum à Domino discipulis Luc. 9. Ut non possiderent aurum, neque argentum, neque duas tunicas &c. Nec vero San-  
cti tantum hanc rerum temporalium abdicationem & circum-  
cisionem sunt amplexi, sed etiam Gentiles multi. Nota est  
Diogenis egestas ejusque dolium. Nota est Crateris quem D.  
Hieron. scribendo ad Paulinum, refert magnum auri pondus ab-  
jecisse, cum ad Philosophandum pergeret Athenas, eò quod non  
putaret, se simul divitias & virtutem posse possidere & Aristides  
vir summus Athenis in tanta paupertate vixit, ut in atrita lacer-  
nula incederet, frigusque & famem domi sè pateretur. Narrat  
D. Chrysost. lib. 2. contra Vituper. vitæ Monastic. lib. 4. de The-  
bano Epaminonda, quod in concionem vocatus venire non po-  
tuerit, quia vestem laverat, nec aliam habuit quam indueretur.  
Scribit etiam Valer. Max. Publicolam posteaquam in ipsa  
urbe Roma ter Consul fuisset creatus, intanta postmodum e-  
gestate mortuum, ut sumptu publico debuerit mandari se-  
pulturæ. Hi confundent in die Judicii Christianos, qui di-  
vitii & bonis temporalibus inhant, qui congregant & thesau-  
risant, qui superfluis abundant, qui nihil minus quam  
hanc moralem circumcisionem cogitant. Studeamus huic  
circumcisioni, amputemus omnia superflua & noxia. Cor-  
rigamus affectus nostros. Castigemus cupiditates nostras, fræ-  
nemus desideria carnis: Ita futurum est ut ad illam circumci-  
sionem perveniamus, ubi non solum omnis cupiditatum nostra-  
rum intemperantia, sed etiam omnis laborum & dolorum, la-  
crymarum, & æruminarum molestia, non ferreo aut lapideo  
cultro, sed plenissimæ felicitatis gladio ressecanda est; cum vo-  
cem illam jucunditatis plenissimam audire à Domino merebi-  
mur. Euge serve bone & fidelis, quia in pauca fui fidelis, supra mul-  
tate constituam, intra in gaudium Domini tui. Matth. 25.

STRE-